

覺又菩薩別解脫經云若於恚怒衆生如是  
安慰極善安慰住此忍者得隨順法喜

大乘集菩薩學論卷第十二

十三

大乘集菩薩學論卷第十三

十三

要經藏教大本試論摩少智登梵大師賜紫沙門巨稱筆

精進波羅蜜多品第十

論曰雖聞住如是忍發生精進然於此未聞  
尚起毀犯如月燈經偈云

傲法不護戒 為得幾多福 破戒縱多聞

十三

無能免惡道

論曰由聞具勝能者那羅延所問經云善男  
子如所聞解得勝惠性若聞息除煩惱令煩  
惱魔皆不得便是中廣如最上大仙本起經  
云菩薩摩訶薩具足深心尊重法欲住餘世  
界現諸佛前隨所聞法若菩薩摩訶薩精進

法欲於山林中貯法伏藏得無量經典法門  
如置掌中又諸菩薩精進法欲而得佛現前  
及諸天等與佛辯才乃至命欲將盡為佛世  
尊及諸天等增益壽命及與色力住命千歲  
非本所求為佛諸天共加持故乃至求住一  
劫又諸菩薩生法尊重為佛世尊除老病苦

得授正念及通達辯才乃至得授正見隨見  
能說又若菩薩摩訶薩精進法欲無他一切  
冤敵等怖是故精進多聞資糧善巧菩薩脩  
習得如是等

論曰菩薩聞幾種行入解毗奈耶如無盡意  
經云由聞八十種行而能入解所謂欲行深

心行深固心行極相應行無倨傲行不放逸  
行恭敬行極尊重行離名相行善言行承事  
行聞利益行作意行不散亂行無住行寶想  
行藥想行消除一切疾病行念器行達解行  
意喜行悟入行聽聞佛法無厭行廣捨行了  
知調伏行親近多聞行喜樂容受所作行身

踊躍行心悅樂行聞不懈退行聞義行聞法  
行聞威儀行聞他說行聞所未聞妙法行聞  
紳通行不樂餘乘行聞諸波羅蜜多行聞善  
薩藏行聞攝事行聞方便善巧行聞梵行行  
聞正念正知行聞已生善巧行聞未生善巧  
行觀不淨行觀惡行觀緣生行觀無常行觀

苦行觀無我行觀寂滅行觀空無相無願行  
無作行善作行建立真實行無減失行單已  
行守護自心行精進不懈行諦察諸法行對  
治煩惱行希求自分善法行降伏他分煩惱  
行依止七財行斷諸貧窮行讚諸有智行欣  
樂智者行衆聖平等行非聖淨信行見諦行

速離諸蘊過失行稱量有爲過失行依義行  
依法行一切惡作行利益自他行於善脩作  
不發餘業行趣向殊勝行所得一切佛法行  
波經又云若於助法相應則得如是智業云  
何助法相應謂若少務少求慎語慎行初夜  
後夜聞諸世間順理相應者稱量利他數數

推求心無濁染除諸蓋障於餘罪犯以智出  
離不起惡作發起趣向堅固正行樂法敬法  
爲法與府具足精進如救頭然希求智惠爲  
游止處不墮禁戒不捨重負趣發殊勝捨無  
益衆樂單已行於阿蘭若現前作意及聖種  
子杜多功德喜足不亂欣樂法樂不念世間

語言求出世法要及無妄念通達義利隨順  
真道知持戒緣慙愧莊嚴以堅實智破壞無  
智以勝惠眼極妙清淨覺了無明癡暗繫縛  
謂廣大覺了無邪曲覺了分別覺了現證覺  
了不從他得持自功德讚他功德善所脩作  
不墮業報是爲智業清淨又般若中說應何

所聞於方廣經論當如是學非義利者亦應  
遠離所謂世間處論輒於論盡毒論默置論  
童子戲論論乃至所有別部解脫等論成就  
癡冥善住一切菩薩乘者悉應遠離又如無  
盡意經云有四種施於說法師爲智資糧而  
得成就何等爲四一者謂紙筆墨經二者嚴

飾法座三者具諸名聞利養四者為攝受法  
不以誣詐稱讚復有四護何等為四一者謂  
護己身二者護善三者護諸世間四者護利  
益事乃至復有四住為智資糧而得成就何  
等為四一者住說法師二者住法三者住利  
養四者住覺悟是名四種又華樓閣經云若

人以須彌量七寶聚布施在家菩薩者不如  
能以千錢奉施出家菩薩或以信解出家功  
德施一指節脩難行施若諸所有唯除出家  
得是大果如來最上最聖非在家者有如是  
理况復在家無智心不具足如最上問經云  
謂若一心於他眷屬等罪而能遠離說為無

罪彼若不能遠離性難調故於在家者建立  
是罪

說阿蘭若品第十一

如最上授所問經說依止住阿蘭若次第居  
家者性過失故又如月燈經偈云

不起著欲 遠離眷屬 棄捨在家

得無上道 若離於欲 如避火坑  
怖畏在家 遠離眷屬 無上菩提  
斯不難得 未有三世 諸佛如來  
由常在家 住於欲地 而能獲得  
勝妙菩提 捨捨王位 如奔效濟  
安住空閑 遠離諸欲 斷除煩惱

降伏魔冤 離垢無為 悟菩提道  
飲食衣服 妙花塗香 而得承事  
人中聖尊 如出家已 奉行正法  
若有如是 求菩提者 善利眾生  
厭有為事 趣向空閑 至行七步  
所獲福報 最勝無比 若復值遇

非眾同分 樂處眾會 憐財利者  
眾生隨行 離彼方所 是愚闇難

彼經又云

智不為愚諍 猛利應當捨 離此極惡心  
勿覺愚者法 智不近於愚 了知愚本性  
能使久相親 後當成怨嫉 智不保於愚

了知愚本性 謂體性癡冥 自當求破壞  
由是諸異生 何有善知識 若法共言說  
不順瞋過咎 斯愚法礮毒 故智者不保  
愚與愚者合 如糞投不淨 智復與智俱  
如酥置酥內 彼經又云

常於世間 最極樂處 無有少分  
若樂不樂 唯樂林泉 隨得受用  
沙門勝樂 若於所有 一切都無  
無有纖毫 所繫屬者 如風轉空  
如獨覺行 乃至世間 諸最樂事  
心常如風 無所繫着 若樂不樂

不有合集 謂此苦惱 不樂安住  
謂若樂彼 無苦無違 離二邊故  
唯此法樂 非人中樂  
彼經又云

彼得常時 微作相應 離別眾失  
不諍少分 彼相應理 住阿蘭若

獲是功德 而常獲得 不怖有為  
不樂世間 不增有漏 住山林者  
獲是勝能 不起過分 常樂近寂  
身語意密 及遠離行 住空閑者  
獲多功德 得彼厭離 速悟解脫  
寂靜解脫 住山林者 即注解脫

諸阿蘭若 獲是功德 棲止林泉  
而常遠離 城邑聚落 樂遠離已  
常如獨覺 無有伴侶 非久如間  
得斯勝定  
又護國經所說偈云  
棄捨在家 無量過咎 亦常不受

深險思慮 得樂山林 諸根妙樂  
寂靜功德 無有男女 戲笑言論  
設有人來 如獨覺行 心淨無垢  
不喜財利 意不耽著 處處少欲  
當遠離此 諛求恭敬  
最上問經云我應不作眾生合集非為於一

衆生而起善根或先所聞具利那頃繫著財  
利心不淨者若天若人咸悉捨去設一天人  
亦復捨去又如寶樓閣經云佛言迦葉波譬  
若有人泛大水中爲渴而死迦葉波此沙門  
婆羅門亦復如是然於多法受持讀誦而不  
能斷貪嗔癡渴游大法海爲諸煩惱渴愛而

死後墮惡道

論曰是故決定依阿蘭若及相似處又寶雲  
經說若住所依之處得行乞食不近不遠流  
泉浴池清淨無垢少怖畏處樹葉花果皆悉  
具足遠離險惡多者龕窻寂靜第一菩薩如  
是當依此處應先晝夜六時自誦經典聲不

高下善閉諸根心不外馳於此淨命繫念所  
受善取其相不著睡眠若王王臣利利婆羅  
門及餘官屬或親來詣阿蘭若處彼比丘應  
作是言善來大王如所施設可就此座王若  
坐時比丘亦坐王若不坐比丘亦立王若諸  
根動亂應當讚言大王得大善利王之境土

有諸具戒具德多聞沙門婆羅門安住其中  
不爲惡人冤賊惱害王若諸根善淨堪爲說  
法即當爲說善巧之法審若不樂善巧則當  
爲說厭離之法審若不樂厭離則當令知如  
來有大慈悲具大威德爲諸來者利利婆羅  
門及餘官屬隨其所宜爲作化度彼若多聞

堪任法器者使聞妙法降伏其心彼等衆生  
信樂是法得大歡喜最上授所問經云復次  
長者出家菩薩住阿蘭若應如是觀察是義  
云何我住阿蘭若中非獨沙門相者而多猛  
惡慵候非密非靜非律儀非相應非願求之  
所共住所謂非人諸惡鳥獸盜賊旃陀羅等

之所共住彼不具足沙門功德爾時我住阿  
蘭若處我應圓滿是沙門義乃至復次長者  
出家菩薩阿蘭若行應如是觀察我以何義  
至阿蘭若我當爲此怖畏云何怖畏謂處衆  
憤鬧怖合集怖貪嗔癡怖憍慢覆惱怖慳嫉  
財利怖色香味觸怖蘊魔怖煩惱魔怖死魔

怖天魔怖無常計常顛倒怖無我為我顛倒  
怖不淨為淨顛倒怖執苦為樂顛倒怖心意  
識怖離障起障怖身見怖我我所怖疑三世  
怖惡友怖惡屬怖名聞利養怖不見言見怖  
不聞言聞怖不覺言覺怖不知言知怖沙門  
垢穢怖于相瞋忿怖三界怖諸有趣生怖三

惡道怖總略一切不善作意怖我為如是此  
惡怖畏行相詣阿蘭若住乃至復次長者出  
家菩薩住阿蘭若當如是學若怖生時一切  
皆由我執所起以要言之復次住阿蘭若遠  
離我執則無我無我所無我相無我愛無我  
想無我見不為我所持不為我所計捨離於

七十三

我不為守護住阿蘭若此非利益復次長者  
住空閑者無已想無他想若於諸法無說則  
於諸法無雜以要言之長者譬如阿蘭若處  
藥草樹林不驚不怖不畏亦無驚懾毛豎此  
出家菩薩住阿蘭若行亦復如是於身發起  
藥草樹林牆壁瓦礫之想心如幻化所生何

有分別及有怖畏驚懾毛豎如是深心於身  
觀察是身無有我人眾生壽者養者意生儒  
童虛妄遍計此怖畏者但有假名虛妄遍計  
不應分別如彼阿蘭若處藥草樹林無有主  
宰亦無攝屬此阿蘭若無有攝屬亦復如是  
於一切法如是知已應起是行所以者何住

空閑者猶若強屍無有主宰亦無攝屬乃至  
復次長者出家菩薩如住空閑於此知已依  
佛所說住阿蘭若即得圓滿白法深植善根  
然後出詣聚落國邑入於王宮而為說法復  
次長者出家菩薩讀誦演說解其義趣入彼  
眾中而得恭敬親近和尚阿闍梨及耆舊中

而新學比丘亦應尊敬亦無懈怠悉自營辦  
無令他惱亦應勿使尊重承事當如是觀察  
又如來應等正覺為諸天人魔梵沙門婆羅  
門及諸眾生尊重供養乃至諸有所作悉自  
營辦不怖承事况復我今欲求無學如是承  
事一切眾生若我承事於他一切供給則我

諸有所作悉自成辦不復怖求承事供給所以者何長者此尊重承事者於比丘功德法中攝取毀犯造此攝取者因得承事故我勿由是法造此攝取彼經又說復次長者彼阿蘭若菩薩法若見若聞和尚阿闍梨疾病者雖廻野應往問訊謂若旦時詣彼應發是

八末

心設復為他所請讀誦解說令住僧坊者如阿蘭若心勿愛著如是住阿蘭若求法無厭於一切事皆空閑想

大乘集菩薩學論卷第十三

大乘集菩薩學論卷第十四

會

要譯經三藏朝散大夫總持師釋教沙門日稱等奉 詔譯

說阿蘭若品第十一之餘

寶積經云復次阿蘭若行若諸異生未得果者見虎狼至勿生驚怖當發是心我本詣此阿蘭若處已捨身命不應驚畏為起慈心遠

離過失使無怖懼又若虎狼斷我命根噉我身肉應起是心我得善利以不堅身而當獲堅固若復不能令噉我肉豈彼虎狼得樂觸耶以要言之復次阿蘭若行有非人來若美若醜不應愛樂亦勿損害若有往昔見佛諸天來此阿蘭若比丘所起諸問難時彼比丘

如力所能隨所學法為諸天說又若有深問難時阿蘭若比丘或未能答而不生恭敬者應語彼言我今未得無學若我當勤佛教時聞法已盡能通解答一切問我今唯能得聞是法乃至總略若住阿蘭若處藥草樹林尚不取着云何為生何等為滅如是觀察是身

無我無主宰無作者無受者誰生誰滅畢竟無有生滅之者是身亦復如是譬若草木牆壁瓦礫無我無主宰無作者無受者因緣和合故即生因緣離散故即滅復次於勝義中無有一法是生是滅彼經又說復次阿蘭若行應發是心然我至此阿蘭若處獨無伴侶